

欽定大清會典事例

欽定大清會典事例卷六百一

兵部

議敘通例 軍功優敘一

軍功優敘。○康熙二十年。平定黔滇。議敘克復黔省等處各官。紀錄二次。克復普安州等處各官。各功加一等。攻取重關大平橋走馬街等處各官。各功加三等。雲南城外迎敵殺賊九千餘名。及克復雲南省城各官。各功加四等。○二十一年。平定臺灣。奉

旨。在事官員各加一級。兵丁各賞一次。○又奉

旨。官兵遠抵海疆。冒險勦寇。非陸路用兵可比。在事官員。著各再加一級。兵丁著再賞一次。以示特加優渥至意。○是年。議敘福建克復海疆各島。廈門金門等處有功官兵。例應功加一等者。加二等。應功加二等者。加四等。以次遞加。分別議敘。○三十七年。平定額魯特噶爾丹。議敘西路官兵。滿洲自參贊以下。實授官員以上。各給一雲騎尉。准襲一次。所有功牌。仍照例分別議敘。護軍校驍騎校各加一級食俸。兵丁各加賞賚。綠營官兵。自將軍提督總兵官以下。現任官各功加二等。候

補候選官。於補官日各功加二等。部冊有名外委官員。照現任官議敘。亦功加二等。部冊無名外委官員。照例將姓名註冊。俟續立有功績之後。亦照部冊有名官議敘。○又奉

旨。綠旗官兵同滿洲大兵。勦滅額魯特。在事有職任守備以上者。給予雲騎尉。○三十八年。議敘中西甯夏三路輓運軍糧。運米墊道各項效力人員。分為四等。現任文武官。一等者以應升之缺即用。二等者加三級。三等者加二級。四等者加一級。候補候選文武官。一等者遇缺即用。二等三等四

等者於補官日照等加級。停用功加。投誠及外委官武生。一等者以守禦所千總用。二等以衛千總用。三等以營千總用。四等以營把總用。降級官。一等者復還原級以原官用。二等三等四等者。於補官日照等加級。革職官。一等者復還原職。二等給六品頂戴。三等給七品頂戴。四等給八品頂戴。以上一等內有現任參領副將三品以上等官。係屬大員。不便應升即用。俱改為加四級。其護運銀米緞疋茶葉車輛。並看米牧放人員。雖非輓運可比。但伊等既經效力。亦應

議敘。現任及候補候選官各加二級。停用功加。投誠及外委官。均以千總用。其在近地輓運者。現任及候補候選官。各加一級。停用功加。投誠及外委官。均以營把總用。再新滿洲隨運墊道。效力有職任者。各加一級。馬甲領催。每人各賞銀二十兩。○五十四年。駐防哈密官兵擊敗準噶爾賊衆。議敘領兵進戰之遊擊。越等以副將用。守備越等以參將用。千總越等以遊擊用。把總越等以守備用。其駐防兵丁一百九十名。均給予把總劄付。內有陣亡者。亦俱給予把總劄

付。令其妻子食把總俸。○雍正元年。議敘克復臺灣官兵。各功加三等。防守淡水營各官。各功加二等。防守澎湖廈門各官。各加一級。奉

旨。臺灣地方。自古未屬中國。

皇考以聖略神威。取入版圖。逆賊倡亂。占據臺地。皇考籌畫精詳。指授地方官員。遣調官兵。七日之內。克復全臺。官兵感戴。

皇考教育之恩。奮勇攻取。甚屬可嘉。茲仰副

皇考從優議敘之旨。官員現行議敘功加之外。概行各加一等。○又平定西藏。議敘在事有功人員。奉

旨。西藏乃自古未至之絕域。所以

皇考曾有從優議敘之旨。此一次議敘軍功。前因無例可援。後亦不得為例。八旗官員進勲之將軍等。著給予世襲三等輕車都尉。參贊大臣給予騎都尉。副都統營總給予雲騎尉。護軍校驍騎校給予一等功牌。仍加一級。綠旗官員。一等者功加一倍。二等者功加五等。三等者功加二等。至於滿洲漢軍綠旗之外委官。皆係一體效力人員。無論由部委外委。概行從優議敘。一等軍功。功加十等。二等軍功。功加五等。三等軍功。功加二等。○五年。平定雲南威遠新平議敘總

督加二級。總兵官功加二等。其餘有功官弁。一等者功加二等。二等者功加一等。三等者加一級。○又平定貴州神苗議敘。總督加三級。提督總兵官功加三等。其餘有功人員。一等者功加二等。二等者功加一等。三等者加一級。○六年。平定雲南土司窩泥議敘。總督加二級。提督功加二等。其餘有功官弁。一等者功加二等。二等者功加一等。三等者加一級。○七年。平定青海議敘有功官弁。一等者功加二等。二等者功加一等。三等者加一級。○九年。平定貴州米貼議

敘有功官弁。一等者功加二等。二等者功加一等。三等者加一級。○十年。平定貴州古州丹江議敘。總督封為一等伯。其餘有功官弁。一等者功加二等。二等者功加一等。三等者加一級。○十一年。平定雲南烏蒙議敘。提督總兵官各功加三等。其餘有功官弁。一等者功加三等。二等者功加二等。三等者功加一等。○乾隆元年。平定福建臺灣北路議敘。總督加三級。提督功加三等。其餘有功官弁。一等者功加一等。紀錄二次。二等者功加一等。紀錄一次。三等者紀錄三次。

次。○三年。平定貴州清江議敘有功官弁。一等者功加一等。紀錄二次。二等者功加一等。紀錄一次。三等者紀錄二次。○四年。平定湖南蒲寅山兇獠議敘總督巡撫各加三級。其餘有功官弁。一等者功加一等。二等者紀錄二次。三等者紀錄一次。○五年。擒獲甘肅烏爾圖水賊衆議敘總督加三級。其餘有功官弁。一等者功加二等。二等者功加一等。三等者加一級。○十四年。平定金川議敘八旗滿洲官員。一等者給一等功牌一。再給三等功牌一。二等者給二等功牌

一。再給四等功牌一。三等者給三等功牌一。再給五等功牌一。綠營官兵。一等者功加三等。二等者功加二等。三等者功加一等。○十九年。官兵擒獲準噶爾賊匪宰桑。奉

旨。副將軍班第。參贊大臣薩喇爾。俱著賞給世襲子爵。

○二十年奉

旨。大兵直抵伊犁。準噶爾部衆人等。載道歡迎。現已撫定賊巢。其身歷戎行諸臣。調度合宜。克成偉績。應加懋賞。用示酬庸。阿睦爾撒納。賞親王雙俸。班第。薩喇爾。俱著晉封一等公。瑪木特。著晉封三等公。色布騰

巴爾珠爾著賞親王雙俸。札拉豐阿著晉封郡王。策布登札布普爾普俱著晉封貝勒。策凌著賞親王雙俸。策凌烏巴什班珠爾訥默庫俱著晉封親王。策凌孟克著晉封郡王。在事大臣官員兵丁著該將軍等分別等第造冊送部議敘。參贊大臣達爾黨阿阿蘭泰等一併交部議敘。兩路管理臺站官員亦著查明議敘。在廷諸臣惟大學士傅恆與朕協心贊畫意在必行著加恩再授一等公爵。以為為國任事者勸。○

又奉

旨大學士公傅恆以加賞公爵具摺奏辭情詞懇摯信

出至誠俯允所請。仍交部從優加等議敘。欽此。遵

旨。議准加六級。○又奉

旨。翼長阿玉錫等帶兵二十二名。奮勇突入達瓦齊賊營衝擊。賊衆驚潰。招撫數千餘人。深屬可嘉。俱著加恩授為散秩大臣。仍加賞男爵。准其世襲。兵丁二十二名。俱著授為三等侍衛。○二十一年。奉

旨。效力軍前之頭等侍衛奇徹布副總管鄂木布甚屬奮勉。賞給世職。以示鼓勵。○又陝甘總督黃廷桂經理軍務。調度合宜。奉

旨。賞給騎都尉世職。令伊子承襲。○又副將軍成袞札

布等追擒叛賊於俄羅斯交界擒獲奉

旨。副將軍親王成袞札布奉命追剿。實心協力。迅速奏功。深屬可嘉。封伊子一人為世子。以獎忠勤。參贊大臣納穆札勒帶兵追擒。一聞逆賊所在。疾馳前進。立為擒獲。甚為勇往出力。著加恩封為一等伯。世襲罔替。其在事大臣官員。交部從優議敘。○二十二年。副將軍兆惠勒辦額魯特。奉

旨。封為一等伯。世襲罔替。又參贊大臣副都統三格哈甯阿。永貴。莽阿。鼎俱奉

旨。賞給三等輕車都尉。世襲罔替。○又擒獲叛賊巴雅

爾之參贊富德奉

旨賞給世職。二十三年擒獲庫魯特賊匪之副都統

順德納奉

旨交部議敘。賞給世職。又參贊大臣富德招撫西哈

薩克奉

旨交部議敘。給予世職。又

諭據將軍兆惠奏報領兵抵葉爾羌城。逆回堅閉不出。當用精兵挑誘。擊敗賊衆。將軍兆惠忠誠勇敢。朕實深為嘉予。著由一等武毅伯加二字。晉封武毅謀勇一等公。以彰獎勞勸功之典。在事大臣侍衛等。查明

奏請加恩議敘。○又

諭大學士兼管陝甘總督黃廷桂。忠誠素著。老成練達。西陲用兵以來。雖未身履行陣。而籌辦一切軍需。動協機宜。多有朕所降諭旨。尚未到肅。而適相脗合。旋即奏到。與朕所規畫。不約而同者。若非體國奉公。不遺餘力。安能精詳妥協。若此。而毫不累民。內地若無事。此其功為尤大。朕心實深倚毗。宜晉崇階。用彰勞績。著由騎都尉晉封為三等伯。以示優異。○二十四年

諭據富德等奏報。統領官兵行至呼爾珥。殺賊千餘。覽

奏深為感慰。此皆

上蒼默垂眷佑。諸大臣以及官兵等忠誠敵愾所致。富德數年來宣力勤勞。今次奮勇督勦。厥功懋著。著加恩封為三等伯爵。舒赫德雖屢經獲罪。今知奮勉自贖。亦屬可嘉。阿里袞送馬濟軍。如期集事。提督豆斌率中營槍礮鼓勇前進。脅受槍傷。著加恩一體議敘。並各賞給世職。所有陣亡及效力之侍衛官員兵丁等。查明造冊報部。一併照例優加敘卹。○又

諭將軍大臣侍衛官兵等。奮勉出力。允宜優敘。以示獎勵。適據兆惠奏辭封爵。從前因伊被圍固守。特加寵

錫。今果全師制勝。何必固辭。前因富德迅速應援。屢敗賊衆。已封為三等伯。今又領兵力戰。與將軍會合。厥功甚懋。富德著加恩晉封一等威勇伯。兆惠軍營之侍郎公明瑞。副都統由屯溫布。總管端濟布。富德軍營之護軍統領努三。副都統鄂博什墨爾根。巴圖魯瑪璫。散秩大臣永慶。俱交部議敘。給予世職。○又副都統瑚爾起等領兵直抵和闐。賊衆聞風潰散。恢復哈喇哈什各城。奉

旨。副都統瑚爾起。巴圖濟爾噶爾。俱交部議敘。給予世職。齊凌札卜噶布舒著授為散秩大臣。交部議敘。給

予世職。○又奉

旨。領隊大臣愛隆阿。福祿在軍營頗屬效力。著交部照例議敘。給予世職。○又奉

旨。據參贊大臣毅勇公明瑞奏稱。追剿逆回於霍斯庫魯克嶺。賊衆六千餘。負隅固守。我兵先至者九百人。整陣鏖戰。經歷三時。賊衆大敗。陣斬逆賊五百餘人。俘獲男婦三十餘人。受傷者無算。我師以寡敵衆。實屬奮勇。明瑞著交部從優議敘。所有本隊得功之大臣侍衛官兵等。並著查明送部議敘。○又奉

旨。富德等奏稱。追及逆酋霍集占於阿爾楚爾。我兵奪

山衝擊。陣斬賊衆千餘人。生擒五十餘人。賊衆大敗。窮竄。現在乘勝追擒。大臣官兵等爭先奮勇。力勦逆回。其自將軍至領隊大臣。俱交部從優議敘。○又奉旨。富德等奏稱。愛隆阿巡查臺站。知瑪呼斯賓巴等一百三十餘人。謀搶掠察罕烏蘇等臺站。逃往安集延。即領官兵追襲。勦賊五十餘人。俘獲男婦七十餘人。甚屬可嘉。從前曾賞伊世職。著再行加賞。其得功官兵。亦從優議敘。○又

諭愛隆阿此次奮勉。非尋常勦賊可比。著加恩賞給騎都尉。○又

諭前此大兵平定準噶爾。各部悉入版圖。獨逆酋霍集
占兄弟辜恩反噬。不得不興師問罪。將軍兆惠富德
等勵衆選兵。先後追勦。屢獲全勝。今逆酋授首。從此
邊陲甯謐。各部落永慶安全。將軍等凱旋至京時。朕
當親臨郊勞。念我大臣官弁等。敵愾奏功。勲施懋著。
酬庸論賞。應備恩榮。將軍兆惠已晉公階。並疊賜章
服。其加賞宗室公品級。鞏。以示寵異。將軍富德著
晉封侯爵。兆惠富德再加授一子為三等待衛。參贊
公明瑞。公阿里哀舒赫德。及在事大臣官員。均交部
從優議敘。兵丁之在行陣者。賞給兩月錢糧。其葉爾

羌城兵丁。並賞錢糧一月。○二十五年奉

旨。此次軍前奮勉之領催得寶。力護將軍喀喇烏蘇之
圍。懋著勞績。著授為三等侍衛。賜號巴圖魯。仍賞銀
一百兩。○二十七年奉

旨。三等侍衛札奇勒圖阿勒丹察。在兆惠軍前。出入重
圍。冒險請援。勞績懋著。自應格外加恩。著授為二等
侍衛。賞給騎都尉世職。○又

諭從前準噶爾部落。素不安分。自噶爾丹時侵擾喀爾
喀。西藏伊等野性難馴。喜事爭奪。互相殘滅。朕特選
將出師。掃除兇逆。不一二年。平定其難。俾安生計。詎

伊等無福承受。復生叛亂。是以更遣偏師。殲除醜類。遂有伊犁。至回人為準夷役使。波羅泥都霍集占俱被拘於額林哈畢爾噶。念伊等為派噶木巴爾後裔。釋歸故地。乃霍集占受朕深恩。毫不知感。輒敢反噬。傷我王臣。因諭凱旋官兵。乘勢收服葉爾羌喀什噶爾諸回城。追勦逆賊。直抵拔達克山部落。該酋即載霍集占以獻。此數十年未竟之緒。五年以來。悉為底定。拓地二萬餘里。均如內地兵民。駐紮屯墾。誠所謂非常之功也。在事奮勉諸臣。應得世職者五百餘人。或隨營效力。或宣力行間。均屬勤勞王事。正不必過

於區別著照部臣所奏一體加恩賞給世職。○三十

三年

諭進勦緬夷官兵奮勇攻擊連破賊壘十六座殺賊二千有餘將軍明瑞著授為一等誠嘉毅勇公原襲承恩公著伊弟奎林承襲。○三十六年

諭溫福等帶領滿洲官兵攻打巴朗拉碉卡殺賊頗多殊屬實心任事溫福五岱俱著交部議敘至我滿洲官兵不過數十名而全無顧慮惟知奮勇不愧為我滿洲臣僕甚屬可嘉此內侍衛章京等有分外著績應賞巴圖魯名號者著溫福等奏聞賞給仍將效力

官兵一併查出。交該部從優議敘。○又四川總督桂林等奏。彝擊賊番碉卡情形。奉

旨。據桂林等攻得約咱賊寨。辦理大有起色。可見事在人為。桂林前已授為總督。似此方克受朕恩眷。其在事感奮著績之副將宋元俊。現降旨賞給總兵銜。參將薛琮都司沈寬等。並交部從優議敘。以示獎勵。○

三十七年

諭。桂林等奏。連日攻得阿仰東山梁各地方。是處為賊緊要門戶。峻險異常。桂林調度深合機宜。鼓勵將兵。得此要地。實屬可嘉。在事之將領弁兵。並著交部從

優議敘。○又

諭。僧格宗距美諾不遠。係小金川險要門戶。賊人負隅拒守甚堅。阿桂殫心籌畫。將士用命。奮勇爭先。乘其不備。潛師襲擊。賊人棄險驚逃。乘勝克捷。覽奏深為嘉悅。阿桂及在事將弁兵練。並著交部從優議敘。○

又溫福等奏攻克明郭宗情形。奉

旨。溫福督兵進剿。攻克賊酋緊要門戶。從此直禱美諾。自可迅奏膚功。溫福豐昇額著交部從優議敘。其在事將弁兵練。奮勇出力。均著查明咨部。一併從優議敘。○又

諭前據阿桂奏攻克美諾。賊豎喪膽奔逃。溫福等即督兵窮追。蕩平巢窟。現雖喙走偷生。而澤旺及頭人通事等咸已就縛。大板昭一帶接到檄諭。亦可望風就撫。小金川全境底定。朕心深為嘉悅。溫福豐昇額著交部從優議敘。其在事出力之將弁兵練。均著查明交部。一併從優議敘。○三十八年

諭阿桂等奏分兵四路奪碉殺賊情形。均屬奮勉可嘉。而三寶綏庫等率衆先登。尤為勇敢。著交部從優議敘。阿桂明亮調度有方。其餘各將領亦俱出力。均著交部議敘。○又溫福等奏攻克木果木碉卡情形。奉

旨。此次官兵不避槍石。盡力攻勦。均屬可嘉。其中海蘭察額森特巴雅爾烏什哈達普爾普馬全阿爾素納。尤為奮勇出力。著交部從優議敘。○三十九年

諭喇穆喇穆山梁。原為此路賊人第一要隘。山形險絕。碉卡最堅。而日則丫口。亦進攻勒烏圍要路。在所必爭。今官兵等皆攀援超越。奮不顧身。殺賊攻碉。靡堅不破。海蘭察不避隘險。每攻必克。尤為超軼出羣。堪稱勇將。皆因將軍參贊等調度有方。故能所向克捷。朕心深為嘉悅。所有將軍參贊以下鎮將員弁。均著交部從優議敘。其實在出力打仗得功兵丁。除交部

照例議敘外。仍著阿桂查明賞給一月錢糧。以示優獎。○又

諭昨據阿桂奏攻克該布達什諾摺內稱。初六日遙見宜喜山梁。已有官兵營盤七座。在上等語。因盼望明亮軍報甚切。今明亮奏至。果於初四日鼓勵將士。乘銳直攻。其達爾圖及俄坡各碉。均已奮迅克獲。實由將軍明亮等抒誠殫力。董率有方。故能所向克捷。朕心深為嘉悅。所有將軍參贊以下將領弁員。及土司土舍土目。均著從優議敘。至此次官兵等冒雨進攻。尤為奮勉出力。除交部照例議敘外。仍均賞給一月

錢糧以示優獎。○又

諭。阿桂等奏大兵攻過格魯古丫口。接通丹壩。覽奏深為欣悅。此次官兵等現距賊巢甚近。奮勇直前。踰越林嶺。晝夜鏖戰。所至克捷。皆由將軍阿桂等審察形勢。調度有方。甚屬可嘉。所有將軍參贊等及在事出力將弁。均著交部從優議敘。其奮勇出力各員。俟阿桂等查明奏聞。另加恩獎。○四十年。以攻得勒烏圍賊巢。紅旗報捷。予將軍阿桂。副將軍豐昇。額參贊。大臣海蘭察。額森特。及在事將弁等。優敘出力之滿漢官兵屯土兵練。均各給一月錢糧。○

又以攻克格隆古科布曲索隆古們都斯得木
巴爾一帶碉卡寨落。並乘勝搶占安布魯木山
峯碉卡。予將軍阿桂參贊大臣豐昇額海蘭察
額森特及在事將領員弁等優敘。○又以攻克
獨古木斯得上下寨落。並搶占乃當之布吉魯
達那兩道山梁。予將軍明亮參贊大臣舒常及
在事將領員弁等優敘。○又以官兵由索隆古
進攻。已據噶占山梁。逆酋之大頭人率屬出降。
予阿桂豐昇額海蘭察額森特及領隊大臣。並
將領員弁等優敘。○又以攻克該布達什諾甲

得古色湖山骹礮卡木城。進圍遜克爾宗。予將軍參贊領隊鎮將等優敘。○又以攻克甲雜官寨。並勦洗後路巴布里日蓋古洛一帶賊巢。進抵獨松隘口。予將軍明亮參贊大臣舒常及領隊大臣將佐員弁等優敘。○四十一年。以攻克馬爾邦賊衆投誠。予參贊大臣富德並將領員弁等優敘。○又

諭阿桂等奏官兵已將金川全境埽平。現在四面攻圍噶拉依巢穴。覽奏深為欣慰。並閱進到地圖。賊境礮卡寨落。均經大兵勦洗。所餘惟噶拉依叢爾彈丸。不

及已得地百分之一。自可即日埽蕩。是征勦金川之役。已屬歲功。又據稱賊酋索諾木弟兄。及作惡頭人。均在噶拉依官寨。今經嚴密圍困。自必即行擒縛。馳遞紅旗。褒績酬庸。宜頒渥典。將軍阿桂蓋誠體國。不憚艱勞。制勝運籌。克成偉績。著加恩封為頭等誠謀英勇公。以昭崇獎。副將軍豐昇額明亮。抒誠勵勇。協力宣勞。亦堪嘉尚。豐昇額本襲公爵。復加賞繼勇名號。著再賞以一等子。明亮著封一等襄勇伯。參贊大臣海蘭察。每遇摧堅奪隘。無不鼓勇先登。實為超衆。著加恩封為一等超勇侯。以示優異。參贊大臣額森

特領隊大臣奎林和隆武福康安普爾普均各奮勇出力。懋著勤勞。額森特著賞給一等男。奎林本係公爵。著加賞一等男。令伊子承襲。和隆武本係子爵。著晉封三等果勇侯。福康安普爾普著賞給三等男。共昭榮獎。大學士于敏中自辦理軍務以來。承旨書諭夙夜殫心。且能鉅細無遺。較衆尤為勞勩。著賞給一等輕車都尉。以示格外恩眷。所有此次恩賞世爵世職均著世襲罔替。○四十九年

諭甘省回民久隸帡幪。食毛踐土。乃敢於光天化日之下。肆其逆謀。經朕特派大學士阿桂陝甘總督福康

安先後帶領巴圖魯侍衛前往督辦。福康安先抵甘省。數日之內。即將底店賊匪勦辦淨盡。阿桂抵石峯堡後。復會同福康安遵照朕硃筆圈示之處。安營設卡。將賊匪嚴密圍堵。勦辦甫經一月。即能迅速殲除。特沛殊恩。以昭懋賞。阿桂前於平定金川時。已封頭等公爵。著再給予輕車都尉世職。福康安籌辦底店賊匪。先得機宜。較為出力。前於平定金川時。已封為嘉勇男。著再晉封為嘉勇侯。海蘭察前在金川時。超衆奮勉。已封侯爵。再給予騎都尉世職。五岱著授為都統。亦予騎都尉世職。至此次勦辦回匪。三月以來。

朕披覽奏章。指示機宜。和珅首承諭旨。繕寫寄發。鉅細無遺。一體宣勞。和珅本身現襲輕車都尉。再著給予輕車都尉世職。歸併前職。照例議襲。其餘在事慶成之軍機大臣。梁國治。董誥。福長安。並軍機章京之勤勞出力者。著一併交部議敘。所有此次賞給各世職。著世襲罔替。○五十二年

諭逆匪林爽文糾集賊黨。滋擾嘉義縣城。圍攻數月。經常青等屢次派兵往援。俱被賊匪阻截。柴大紀在城內率領官兵義民。悉力保護。正在急迫之際。福康安海蘭察督率將弁官兵。鼓勇直進。並不俟貴州湖南

續調兵丁到齊。即將現有兵民分為五隊。派鄂輝等分隊帶領。沿途勦殺賊匪。俱能奮勇直前。不避險阻。將各處邨莊屯聚之賊匪。痛加殲殺。直抵縣城。數月之圍。應手而解。城內數萬生靈。得獲更生之慶。並將賊人存貯糧米。運入縣城。軍精民食。益資充裕。此皆福康安等調度有方。振作士氣。用能克敵致果。迅奏捷音。自應優加寵錫。福康安海蘭察現俱係侯爵。著晉封公爵。以示優異。其鄂輝舒亮普爾普等及巴圖魯侍衛章京。並在事出力之鎮將弁員等。俱能領率兵民。鼓勇奏績。著查明咨部。一併從優議敘。○五十

三年

諭逆首林爽文。經福康安等設法生擒。辦理周妥。實屬
可嘉。在事出力將弁。查明咨部議敘。隨征兵丁分別
獎賞。大學士和珅始終承旨書諭。於一切清滿事件。
鉅細無遺。懋著勤勞。自應特加優賞。和珅本係一等
男爵。著照從前大學士張廷玉之例。晉封為三等伯。
大學士阿桂王杰。尚書福長安董誥。夙興夜寐。一體
宣勤。俱著交部議敘。孫士毅以鄰省總督。一聞逆匪
滋事之信。節次派調兵丁。撥運軍餉火藥鉛丸等項。
源源接濟。迅速周妥。甚為出力。著照從前大學士蔣

廷錫之例。賞輕車都尉世職。○又

諭此次大兵進勦安南。孫士毅自請統兵出關。過壽昌江後。趕緊前進。將市球江屯紮賊匪。殲戮數千人。乘勢直抵富良江。賊匪紛紛逃潰。追殺生擒甚衆。辦理甚為妥速。孫士毅力肩重任。調度有方。不及一月。即已迅奏膚功。克副委任。著加恩晉封為一等謀勇公。許世亨隨同帶兵勦賊。著封為一等子爵。其在事出力鎮將文武員弁。查明分別等第。咨部從優議敘。各路官兵。賞給一月錢糧。其較衆尤為出力者。查明賞給兩月錢糧。○又以臺灣南北兩路賊目悉就俘擒。

全郡平定。予將軍福康安參贊大臣海蘭察鄂輝暨在事出力大小將弁等優敘。隨征兵丁查明分別獎賞。○五十七年

諭廓爾喀滋擾衛藏。肆行搶掠。命福康安等領兵進剿。屢次克捷。收復後藏邊界濟隴等處地方。深入賊境。痛殲賊衆。進剿以來。連獲勝仗。收復濟隴聶拉木並攻克熱索橋協木魯東覺集木集等處。賊匪悔罪乞降。歲功完善。福康安等為統率大臣。調度布置。悉協機宜。福康安著賞給一等輕車都尉。海蘭察本係二等公。著晉封一等公。○六十年

諭。湖南貴州等處苗民吳半生吳隴登石柳鄧石三保糾衆滋事。肆行不法。延及貴州銅仁四川秀山地界。福康安遠駐滇南。一經得信。不待朕旨。即兼程馳往督辦。不辭勞勩。親帶官兵鼓勇直前。所向克捷。焚燒木柵。占奪石城。殲戮苗衆。不可勝計。實屬奮勇可嘉。應即加恩優獎。國家定制。獎勵勲臣。若非宗室。皆不過五等之封。惟國初額駙揚古利曾以殊勲追贈王爵。福康安前經出師金川。及平定石峯堡臺灣廓爾喀。屢著勲績。已節次晉封至一等忠銳嘉勇公。此次督勦苗匪。又復勤奮出力。福康安著加恩仍帶榮賞。

四字佳號。晉封貝子爵銜。即照宗室貝子之例。所有護衛官員。聽其自將家人揀放。此乃逾格恩施。俾異姓盡臣。得邀殊寵。將來我八旗大臣。有似此超衆宣勞者。均可援以爲例。豈非國家世臣之福。○又以圍攻苗匪鴨保等巢。打仗奮勇。予將軍福康安及帶隊之額勒登保。德楞泰。花連布。常明。綸布春。優敘。其辦理糧餉軍火。均無遺誤。之四川總督孫士毅。湖廣總督畢沅。湖南巡撫姜晟。貴州巡撫馮光熊。亦分別優敘。○又以苗匪滋擾四川秀山縣界。奮勇勦殺。予總督孫士毅優敘。

欽定大清會典事例卷六百二

兵部

議敘通例 軍功優敘二

嘉慶元年。勦捕苗匪。收復乾州。

諭。額勒登保。屢次打仗奮勉。曾加恩補授內大臣都統。此次於渡河後。帶領兵丁首先登岸。實為奮勇可嘉。額勒登保。德楞泰。著交部從優議敘。○又

諭。明亮等奏官兵連日奮勇殺賊。斬梟首逆石柳鄧。並生擒石柳鄧之子石老喬。歲功獻馘情形。並將前獲監禁之伊子石老觀一併解京治罪。綏靖苗疆。歲功

完善。覽奏深為嘉悅。明亮鄂輝馳抵軍營後。與額勒
登保德楞泰遵照指示機宜。督率有方。所向克捷。而
額勒登保自用兵以來。節次帶兵。首先殺賊。尤為奮
勇可嘉。德楞泰鄂輝分路領兵。亦屬奮勉出力。現在
大功告竣。苗境肅清。尤宜各加懋賞。用示酬庸。明亮
封為襄勇伯。額勒登保封為威勇侯。德楞泰著賞給
子爵。鄂輝著賞給男爵。以示優獎勲勞至意。所有此
次打仗滿漢屯土官兵。俱著加恩賞給兩月錢糧。其
在事出力大小員弁。並著明亮等查明咨部。從優議
敘。用昭獎勵。○又

諭小坳地方。為來鳳賊匪屯集。經孫士毅督率將弁。由
間道進攻。冒雨直前。將賊巢悉行焚燒。殲賊甚衆。在
事將弁。人人奮勇爭先。實堪嘉獎。孫士毅本有一等
輕車都尉世職。著加恩晉封為三等男爵。用示優眷。

○又

諭明亮奏將孝感縣屬胡家砦賊匪全數殲滅。不使一
名漏網。實為奮勇可嘉。明亮著賞給輕車都尉世職。
用昭優獎。○又

諭畢沅前此勦洗當陽賊匪。擒渠俘逆。肅清縣治。今惠
齡又將灌灣腦賊巢全行掃蕩。生擒首逆張正謨等。

均屬奮勉可嘉。畢沅惠齡著一體賞給輕車都尉世職。用昭優獎。○二年

諭。勒保自攻克安有山梁之後。督率官兵奮勇擊剿。攻克張奇下蝦扎箐。及長沖上蝦扎箐二龍口等處山梁。殺賊三千七百餘名。生擒三百七十餘名。並殲擒賊目岑朝英等二十餘名。即分兵八路同時進剿。所有洞洒當丈賊巢。全行洗蕩。共燒斃一二萬人生擒男婦大小二千六百餘名。此次勒保連日乘勝進剿。分路攻擊。將士等俱各奮躍爭先。並無片刻停留。勒保督率弁兵擒渠掃穴。調度有方。深可嘉尚。著格外

加恩封為侯爵。用昭懋賞。所有八路領兵出力文武將領等官。俱著查明咨部。從優議敘。○又以按勦馬乃屯。羅鍋背松林紅巖等處賊寨。並生擒著名賊首黃阿金等犯。暨收撫附近馬乃屯之婦孺。嶺木肋坡舊營等寨。予四川總督鄂輝布政使常明。總兵施增優敘。○三年

諭。勒保奏。埽蕩安樂坪賊巢。將川省首先滋事渠逆王三槐。臨陣生擒。勒保董率將士。調度有方。埽穴擒渠。膚公克奏。著加恩晉封公爵。軍機大臣大學士伯和珅。襄贊機宜。承旨書諭。一手經理。夙夜宣勞。著加恩

晉封公爵。福長安日直樞禁。勞績倍著。自辦理軍務以來。一體始終其事。著加恩賞封侯爵。王杰董誥沈初戴衢亨那彥成。均著交部從優議敘。○四年

諭。惠齡等奏攻克麻壩寨。生擒首逆冉文雋。此次官兵分路環攻。殲賊多名。擒縛渠魁。掃蕩巢穴。甚為奮勉。可嘉。惠齡德楞泰俱著加恩賞給頭等輕車都尉世職。以示嘉獎。○又

諭。勒保奏官兵剿捕蕭占國張長更兩股賊衆。全數剿獲。淨盡。覽奏曷勝欣慰。該逆匪等由閬中折回。經額勒登保率領將弁兵丁。連次截剿。逼上譚家山。復督

弁兵乘夜搶上山梁。痛加勦戮。賊匪斬獲殆盡。蕭占國張長更均經殲斃。此次打仗得勝情形。實為認真勦辦。額勒登保著加恩賞給二等男爵世職。○又

諭。勒保奏官兵勦捕冷添祿一股賊匪。首逆全行掃蕩。

勒保調度得宜。能得人心。以致將弁等皆知感恩報效。實不負經略大臣之任。深堪嘉獎。至額勒登保前將蕭占國張長更兩股賊匪全行辦竣。茲於途次一聞冷添祿在岳池地方游奕之信。即由間道督兵冒雨遙行。趕抵賊巢。痛加勦殺。冷添祿中箭身斃。又復乘勢將餘匪撲滅淨盡。旬日之內。殲除三股賊匪。實

為奮勇可嘉。前已加恩賞給二等男爵世職。著再晉加一等男爵。○又

諭。勒保奏朱射斗追勦包正洪一股賊匪。在小毛坪地方殲賊甚多。首逆包正洪中槍身死。此次打仗將領官兵等。奮勇出力。甚屬可嘉。朱射斗著賞給騎都尉世職。○又

諭。綫字號首逆龔文玉在夔州一路為傳教總師。經官兵節次勦敗。竄至竹谿所屬之大木田。德楞泰分兵由雙橋進發。繞至大木田山頂。截其奔竄之路。連夜攻圍。併力生擒。實屬奮勇出力。德楞泰著加恩賞給

騎都尉世職。○又

諭倭什布奏楚省竄匪李淑等股。逃入保康歇馬河一帶。經倭什布督兵追剿。紛紛潰敗。臨陣殲擒。及被裏投出者幾二千人等語。此次剿捕賊匪。倭什布緊蹙追襲。痛加殲戮。深為出力可嘉。著賞給雲騎尉世職。

○又

諭德楞泰奏生擒首逆高均德等。剿辦高家營賊匪一摺。所辦深為可嘉。德楞泰前因拏獲冉文傳。賞給頭等輕車都尉世職。又因生擒綏字號首逆龔文玉。加賞騎都尉世職。應併作三等男爵。今著再加一等。賞

給二等男爵。以示優獎。○五年

諭。德楞泰奏連日截勦渡江各股賊匪。大獲全勝。生擒著名首逆冉添元等一摺。覽奏深為欣慰。德楞泰此次帶兵入川。連獲勝仗。今又五日四戰破賊姦計。殲厥渠魁。深堪嘉獎。德楞泰本係二等男爵。著加恩晉封三等子。以示優眷。○又

諭。德楞泰奏川西竄匪搶渡潼河。帶兵追勦。殄擒著名首逆雷世旺。教首孫老六。及偽總兵大小頭目等因一摺。覽奏實深欣慰。前此德楞泰在劍州李家坪等處。將張子聰等股賊衆。大加殲戮。後復跟蹤追勦竄

往南部鹽亭賊匪。原冀前有潼河阻隔。趁此極好機會。將賊匪追至河邊。逼投絕地。以期一鼓殲擒。詎賊匪竄過潼河西岸。德楞泰帶兵踵至追擊。未經渡河之賊。殲獲淹斃一千數百名。因即緊躡賊蹤。盡力追趕。擒殄首逆要犯及大小頭目多名。共殲賊匪一千三四百名。生擒賊匪及被脅難民一千三百餘名。分別辦理。並救出四寨被圍之百姓一萬數千人。實屬可嘉之至。德楞泰為國宣力。拯救良民。旬日之間。捷音連至。自應再加懋賞。用獎勤勞。德楞泰前已封為三等子。著晉封一等子。實授成都將軍。至派往勦辦

圍逼成谷太和等四寨賊匪救出一萬數千良民之
侍衛達勒精阿副將倭星額及隨同德楞泰打仗出
力之副都統賽沖阿溫春副都統銜穆勒塔總兵李
紹祖俱著交部從優議敘○六年

諭德楞泰奏帶兵趕抵山陽痛勦高二賊股殲戮偽元
帥閻慎珍傳教首逆龔如一共殲賊一千一百餘名
獲犯一千三百三十餘名將賊匪逼向西南其功甚
大德楞泰著加恩賞還一等子賽沖阿殺賊奮勇著
交部從優議敘○又

諭額勒登保等奏楊遇春等督兵生擒高馬二逆並將

賊匪全數掃蕩無遺。額勒登保調度有方。允宜施恩嘉獎。伊本係三等子爵。著加賞二等子。楊遇春本有雲騎尉世職。著加恩賞給騎都尉。格布舍本有恩騎尉世職。著加賞雲騎尉。應元寬著賞給恩騎尉世職。以示獎勵。○又

諭。勒保分派鎮將跟勒高魏二逆。與阿哈保薛大烈帶領大隊。向通江兜截。分投截擊。三路並進。殲擒賊匪九百餘名。所辦實屬可嘉。勒保著加恩封為三等男爵。阿哈保薛大烈著加恩賞雲騎尉世職。以示優獎。

○又

諭額勒登保數年以來。所至之處。身先士卒。調度有方。楊遇春等節次生擒渠魁。皆係額勒登保分出兵力。調遣合宜。故能所向克捷。額勒登保著加恩晉封三等伯爵。德楞泰著加恩晉封二等伯爵。賽沖阿著加恩賞騎都尉世職。溫春著加恩賞雲騎尉世職。以示獎勵。軍機大臣慶桂董誥戴衢亨。承旨書諭。尚能周到勤勉。著加恩交部從優議敘。○又

諭額勒登保奏穆克登布現在患病不能動履等語。穆克登布帶兵勦賊以來。頗為奮勇。前次勦淨蕭占國。張長更及殲斃首逆龐洪勝。楊開甲。曾印伍懷志等。

屢著勞績。節經加恩優敘。未給世職。念其疊次勦辦有功。近復因勞得病。自應酬以懋賞。穆克登布著加恩賞給雲騎尉世職。○七年

諭。德楞泰奏督兵冒雨趕勦樊曾賊股。淹斃極惡元兇樊人傑。首逆曾芝秀。殲戮樊逆之子樊龍。生擒其妻王氏。樊曾股匪。勦洗殆盡。德楞泰節次殲擒首逆。疊次加恩遞封二等伯。此次又復將元兇極惡之樊人傑及首逆曾芝秀等。奮勇逼勦。投河淹斃。德楞泰著加恩晉封三等侯。將軍賽沖阿副都統溫春總兵馬瑜。分別帶兵。俱屬奮勇。著加恩交部從優議敘。提督

長齡著加恩賞給雲騎尉世職以示獎勵。軍機大臣
慶桂董誥戴衢亨承旨書諭甚屬周到勤勉著加恩
從優議敘。軍機章京章煦承辦軍務最久亦著交部
從優議敘。○又

諭勒保督兵截勦黃白青藍等號各夥賊匪全數掃蕩
生擒白號著名首逆劉朝選黃號掌櫃伍金元並殲
斃賊目多名餘匪殲除殆盡辦理甚屬可嘉勒保著
加恩晉封一等男以示獎勵。○又

諭額勒登保等奏報官兵殲斃首逆苟文明並擒斬餘
黨捷音苟文明為積久著名首逆頻年以來在川陝

楚地方。輾轉奔逃。肆意擄掠。實為罪大惡極。經額勒登保在花石巖地方。四路挖逼。立時戮斃。斬級梟示。並將餘匪儘數殲除。皆由額勒登保調度得宜所致。不愧經略之任。殊屬可嘉。著加恩晉封為一等伯。○

又

諭。額勒登保奏報趕剿黃藍綫字各號股匪。疊獲勝仗。生擒首逆景英等。並楚省老教賊目崔連樂各情形一摺。額勒登保調度得宜。勲勞懋著。前已封為一等伯。著再加恩晉封為三等侯。穆克登布。勲辦此股賊匪。首先督兵搶上山頂。擒獲多賊。奮勇可嘉。前曾賞

給雲騎尉世職。茲再加恩賞給騎都尉世職。○又

諭。川陝楚勦捕匪逆。大功戡定。此事係勦捕內地亂民。

雖非勦平外域拓土開疆可比。然辦理已及七載。領兵大臣及各督撫並在廷王大臣等。均能各殫心力。用藏鉅功。允宜普沛恩綸。酬庸懋賞。成親王在軍機處行走。贊襄機務。一切勦捕事宜。彌資擘畫。今大功告竣。自應加獎公勤。著施恩加賞一員。勒令其子綿懃受封。儀親王著施恩賞封一員。子。令其子綿志受封。慶郡王永璘之子綿懃。定親王綿恩之子奕紹。俱封為八分公。以彰恩渥。額勒登保總統師干。公忠懋

著。謀勇並優。自膺經略重任。運籌決勝。悉合機宜。躬親行陣。與士卒同勞苦。用能屢獲渠魁。埽除苞孽。業經節次加恩。晉封三等侯爵。茲三省全奏。底平。厥功殊偉。額勒登保著晉封一等侯。世襲罔替。並授為御前大臣。加太子少保銜。以昭殊錫。德楞泰自授為參贊。後督率將士奮勇超倫。所向克捷。前後殲賊最多。勲績炳然。節經封為三等侯爵。著加恩晉封一等侯。加太子少保銜。伊子蘇沖阿並賞給副都統銜。勒保從前辦理猗苗。曾經賞封侯爵。嗣命川省總統軍務。生擒賊首王三槐。晉封公爵。旋因辦理遲延。降旨逮

問。後念其於川省地方情形熟悉。仍令赴川帶兵。洊升總督。勒保自復任以來。倍加奮勉。協同德楞泰將川省全境廓清。已封一等男爵。現當大功戡定。著加恩晉封為一等伯。並加太子少保銜。明亮為多年宿將。教匪滋事後。派令統兵勦辦。尚能奮勉立功。著加恩賞封一等男。西安將軍賽沖阿。固原提督楊遇春。在諸將領中勇略尤著。伊二人俱經賞給騎都尉世職。著加恩賞輕車都尉世職。吳熊光自簡任湖廣總督以來。一切運糧團堡事宜。實心經理。著加恩賞給太子少保銜。仍交部從優議敘。大學士慶桂董誥尚

書戴衢亨。自用兵以來。承旨書諭。勤慎小心。慶桂董
誥著賞給騎都尉世職。戴衢亨著賞太子少保銜。仍
賞給雲騎尉世職。大理寺少卿章煦。在軍機章京上
行走年久。辦理軍務。始終其事。著加恩交部從優議
敘。○八年

諭。上年冬間。宿州匪徒滋事時。據費淳等奏稱。按察使
珠隆阿。首先帶兵入城圍拏。身受重傷。冒險進逼。使
賊匪無路奔逃。旋經辦淨。甚屬奮勇。當已將珠隆阿
賞戴花翎。並交部從優議敘矣。昨珠隆阿到京。陛見
其身被多傷。尚未全愈。殊堪憐憫。復命軍機大臣詳

細詢問。據稱彼時聞信馳往。因恐賊匪驚竄。豫將該州三門堵住。即帶家人兵勇。由西門衝入。立時槍斃賊匪數十人。該匪等奪路奔竄。抵死抗拒。珠隆阿猝被兜圍。以致頭面手足共受傷十六處。猶復親斃數賊。經家人鄉勇等併力齊上。賊始潰敗等語。似此奮不顧身。勇往殺賊。即在軍營將弁中。已屬難得。況珠隆阿係屬文員。殊堪嘉尚。著再加恩賞給法福哩巴圖魯名號。以示優獎。至隨從珠隆阿入城殺賊之張慶。於賊首王潮名在州署中指揮時。立用擡槍擊斃。亦屬出力。詢之珠隆阿。據稱張慶並非家奴。著加恩

以外委錄用。即交珠隆河帶回安徽省。於宿州營伍當差。○又

諭額勒登保奏親督官兵勦賊殲斃緊要賊目。現赴川東趕勦另股賊匪緣由一摺。覽奏欣慰。齊國典一起零匪百餘人。經官兵追勦緊急。又分三股奔逃。經額勒登保親督官兵並分派將領跟蹤擒捕。均有斬獲。將賊目齊國典。偽元帥靳思慶。偽先鋒路紹成。殲斃所辦好。自上年奏報戡定以來。賊匪著名首逆均已殲戮。惟齊國典一犯前曾隻身潛匿。繼又結夥奔逃。輾轉稽誅。今臨陣殲斃。是從前未獲兇渠。實無一名。

漏網。指日即可全數廓清。額勒登保前因冒昧陳奏
善後事宜。干預地方事務。曾經降旨將伊革去御前
大臣並紫韁。稍示薄懲。嗣伊陳明實係伊一人主見。
並非聽信地方官慫恿。且伊於外省地方情形。本不
甚熟諳。自經朕訓飭以來。甚知感奮。親督官兵。認真
趕剿。將緊要賊目儘數殲除。實為可嘉。額勒登保著
賞還御前大臣並紫韁。用昭優獎。遊擊馬成林帶同
弁兵入林擒捕。使齊國典無路可逃。跳崖跌斃。實為
出力。著交部議敘。其硃筆圈出之把總毛三貴。兵丁
陳玉奉。軍功熊鳴鳳。余貴。均著加恩賞戴藍翎。以示

鼓勵。○又

諭。本日由六百里遞到額勒登保德楞泰勒保會奏官兵剿捕餘匪全竣。三省地方肅清喜摺。覽奏實深欣慰。經略額勒登保。參贊德楞泰。於上年冬間奏報大局戡定之時。錫爵酬庸。曾邀上賞。現雖係剿捕餘匪。辦理又經八月有餘。奮勉窮搜。不遺餘力。前後復誅斬著名遺孽十有餘名。此外偽先鋒偽總兵等。又殲擒數十名。其餘賊夥殲擒招撫者。共以千計。現在更無遺孽。三省地方甯謐。辦理實為完善。額勒登保德楞泰。俱交部從優議敘。四川總督勒保。湖廣總督吳

熊光。陝甘總督惠齡。督率地方文武及堡寨民人幫同擒捕。勤勉出力。均著交部議敘。並著查明實在超衆出力人員。據實保奏。候朕施恩。以示鼓勵。軍機大臣等承旨書諭。獲與觀成。大學士慶桂。宣力有年。且在軍機處行走。班次居首。著加恩賞戴雙眼花翎。大學士董誥之子董淇。本由廕生任戶部員外郎。著加恩以郎中用。尚書劉權之德瑛。在軍機處行走。已越一年。劉權之著加恩交部議敘。德瑛昨因會同禮部具摺字句疏忽。部議上時。已經加恩留任。此次毋庸交部議敘。尚書戴衢亨之子。年尚幼稚。伊姪候選縣

丞戴嘉穀著加恩賞加知縣升銜。仍令在

實錄館效力行走。軍機章京等。著軍機大臣查明出力之員。據實保奏。候朕加恩。本日接遞喜報之奏事處員外郎瑞甯。著加恩賞戴花翎。仍交部議敘。其在奏事處領班之御前侍衛副都統扎克塔爾。及郎中滿保。清安員外郎常申。德興。克蒙額。均加恩交部議敘。兵部捷報處之員外郎景德。著加恩賞戴花翎。員外郎德昌。前已賞戴花翎。主事札蘭泰。前已賞戴藍翎。著與筆帖式輔良。劉永澤。均加恩交部議敘。其自軍營至京沿途各驛站接遞喜報之官員夫役。俱著加

恩交該督撫查明分別升賞。用示歲功行慶至意。○

九年

諭。本日據德楞泰奏報官兵抄住餘匪。大加痛剿。生擒偽元帥羅思蘭。符廷富。偽總督王宗福。紀友亨。蕭昌奉。並夥匪七十餘名。殲斃偽元帥李明玉。周天良。總管王士奇。袁泰二姓。及矛手多名。覽奏欣慰。川陝餘匪。經官兵擒捕以來。總在老山菁林潛竄。德楞泰自三月間。在陡險尖奏捷一次。迄今半載有餘。屢經降旨飭催。今據奏稱本月十二日。賊匪竄至鳳凰寨。經楊遇春。豐伸等。分兵三路。併力並進。鏖戰逾時。賊匪

敗上啞口。適馬瑜等督率弁兵緊躡追來。兩面夾擊。計先後斬擒賊匪一百數十名。並偽元帥偽總管多名。可見按捕日久。鎮將弁等尚非心存懈玩。自因賊匪負踞險阻。兼以夏令雨水載塗。未能即時得手。此次賊匪甫出箐林。即能殲獲首夥多人。大得勝仗。官兵甚屬出力。此尚係額勒登保在軍營時與德楞泰籌商布置。調度有方。前因伊二人督辦遲延。曾降旨革去紫韁。換戴單眼花翎。俾知激勵。茲捷書馳報。自當即沛恩施。額勒登保德楞泰均著賞還紫韁。楊遇春豐伸馬瑜田朝貴均著交部議敘外。尤為出力者。

並著據實保奏。以示獎勵。○又

諭。德楞泰奏到官兵分股截剿賊匪。殲斃首逆。苟文潤。偽元帥趙剛雲等。餘匪潰散。現在趕緊掃蕩。各情形一摺。覽奏欣慰。苟文潤一犯。積年稔惡。偷竄餘生。經官兵擒捕以來。尚敢率其零星潰匪。東逸西奔。肆行抗拒。實屬罪大惡極。今竄至魚碇子老林。經軍功趙洪周乘間殲斃。赴營稟報。既據馬瑜查驗屍骸。顱骨復據德楞泰訪詢屬實。趙洪周太係軍功鄉勇。賞有藍翎五品頂戴。遣撤回家。嗣因看見告示。有擒斬苟朝九等賞格。復告充探信軍功。迨至八仙河地方。被

賊擄去。趙洪周假意入夥。留營做飯。知苟文潤係偽元帥。伊遂格外殷勤。使無疑慮。因潛買屠刀。相機行事。此次乘該逆夜間熟睡之時。斬馘逃出。是趙洪周實係處心積慮。計殲首逆。非逆黨無路求生。殺賊獻功者可比。殊屬可嘉。趙洪周著仍以五品頂戴加賞花翎。即以千總補用。補得實缺後。仍著送部引見。以示優獎。德楞泰督兵控剿。今首惡就殲。大功指日全成。著加恩賞還內大臣並一等侯爵。賽沖阿、豐伸馬、瑜田、朝貴、分路帶兵。均有斬獲。賽沖阿著賞還輕車都尉世職。仍賞戴花翎。豐伸馬、瑜均著賞還原有巴

圖魯名號仍俱賞戴花翎。田朝貴著賞還提督銜。○

又

諭。本日德楞泰由六百里遞奏餘氛掃蕩。三省全功告
歲一揖。覽奏曷勝欣慰。額勒登保德楞泰前此奏報
殲獲餘匪多名。節經加恩賞還雙眼花翎紫韁並原
有爵職。其將領等世職翎頂並所得升銜亦均一體
賞還。此次奏報全捷。除額勒登保現已遵旨起程回
京外。德楞泰著加恩再交部從優議敘。將軍賽沖阿。
提督楊遇春。豐伸馬瑜慶成。總兵田朝貴。喜明。王兆
夢。慶溥著加恩俱交部議敘。副將吳廷剛著軍機處

記名。遇有總兵缺出。即行簡放。○又

諭。勒保前於嘉慶二年間。勦捕貴州狝苗。悉心籌辦。埽

穴擒渠。俾苗疆永臻甯靖。厥功甚偉。當經錫封侯爵。

事竣後。調赴四川。總統軍務。勦辦邪匪。因生擒首逆

王三槐。晉封公爵。嗣授為經略大臣。其時賊匪四散。

竄擾。勒保未能通盤籌畫。駐守達州。漫無調度。是以

將伊褫職逮問。旋因帶兵乏人。賞給藍翎侍衛。令其

前往四川。立功自贖。伊深知感奮。歷著戰績。因與德

楞泰兜勦張金連。解大川等逆。復授為四川總督。繼

又生擒首逆多名。洊封一等男爵。此次大功告竣。已

加恩晉封一等伯。茲閱館臣編纂方略。載有嘉慶四年三月間。勒保奏通飭川東川北各州縣。悉令百姓等依山附險。各結寨落章程。井井有條。彼時賊匪正被官兵四路兜剿。以窮奔鋌走為能。往往於所過鄉邨。擄人掠食。肆其兇殘。久而滋蔓。自結寨以後。不特百姓自保身家。而賊匪亦無由焚劫。且居民等憑依險固。心膽既壯。賊至即合力攻擊。斬獲甚多。其後陝楚一律仿行。賊勢日行窮蹙。始能將無數兇渠。以次掃蕩。今三省全境肅清。閭閻安堵如常。揆厥所由。實得力於堅壁清野之策。勒保首先倡議。洞悉機宜。得

以歲功完善。允宜懋賞酬庸。勒保著加賞太子太保銜。並賞戴雙眼花翎。至明亮本係宿將。從前平定兩金川時。曾蒙

皇考高宗純皇帝賞封伯爵。緣事褫革。迨勦辦苗匪。斬擒首逆石柳鄧等。復封伯爵。嗣因帶兵截勦高均德。不能顧及姚之富齊王氏等大股賊匪。致令竄合。革職治罪。旋經帶兵立功。洊加拔擢。又因所勦張漢潮脫逃。予以褫革。而該首逆旋即就殲。伊尚無疏縱不力情事。是以復經任用。仍在湖北督兵。殲擒多賊。屢獲勝仗。後以年老回京供職。前於大功告竣時。已封

為一等男。茲晉秩尚書。念其久歷戎行。頻年宣力。覈其前後勞績較多。著加恩晉封為一等子。以示朕嘉獎勳臣有加無已至意。○又以圍剿安徽省宿州匪徒余連等。迅就撲滅。予總督長齡。徐州鎮總兵喜明。壽州鎮總兵德成。額照軍功例。優敘受傷外委李衡年。以把總拔補。○十一年

諭。本日賽沖阿奏節次垂詢諭旨。並巡洋官兵拏獲賊目匪夥。審明分別辦理各摺。蔡逆自上年冬間竄至臺灣地方。勾結陸路匪徒。肆行滋擾。公然豎旗稱王。焚劫鳳山縣城。並將郡城圍攻數月之久。彼時內地

大兵未及配渡。臺郡兵力較單。愛新泰慶保二人率同地方兵勇。隨宜援應。悉力拒守。得以無虞。其功甚偉。前命賽沖阿查明據實保奏。茲復據賽沖阿奏稱。當蔡逆匪船進口之時。原有一百餘隻。維時李長庚在鹿耳門招外寄掟。愛新泰慶保與該提督約信會合。用計火攻。前後焚燒大小賊船計七十餘隻。匪船駛近招口。經李長庚督兵攻勦。不能出口。適風順潮長。賊始乘機竄逃等語。是蔡逆之不能久於窺伺臺灣。實係伊二人同李長庚夾攻之力。李長庚亦並無玩縱情事。惟伊究係專管水師之員。疏防之咎。實無

可辭。是以將伊革去頂戴。責令自效。至愛新泰慶保
原在陸路防守。今餘匪挖捕將淨。全郡敕甯。允宜褒
獎勤勞。以昭懋賞。愛新泰前因收復鳳山。肅清南路。
已賞給雲騎尉世職。著再施恩加賞為騎都尉世職。
慶保著加恩賞給雲騎尉世職。並賞戴花翎。副將金
殿安什格。參將英林。同知吳應魁。前此進兵斗六門。
與賊匪打仗得勝。殲獲多名。茲既據賽沖阿查明尚
無捏飾情事。著施恩均交部議敘。其餘員弁兵勇屯
番內。有實在出力應行保奏者。著賽沖阿確切查明。
再遵前旨保奏。至守備王贊。前此堵禦蔡逆。本屬出

力。是以加之恩擢。此次復能實力巡緝。拏獲賊目賊夥多名。殊屬奮勉。著加恩照賽冲阿所請。再行賞戴藍翎。○又以克復臺灣鳳山縣城。賞還總兵愛新泰花翎。○又以甯陝新兵叛逆。勦辦迅速。予參贊大臣德楞泰暨隨同帶兵之札克塔爾溫春薛大烈楊遇春議敘。並賞還楊芳花翎。○又

諭。李長庚奏攻勦蔡逆情形一摺。覽奏實深憐憫。此次李長庚督兵圍捕蔡逆。殲擒盜匪多名。且能不遺餘力。攬船擒捕。以致身受多傷。實為奮勉。本應即予甄敘。特以前在鹿耳門不能截拏蔡逆。曾經革去翎頂。

責令立功自贖。茲著加恩先行賞還頂戴。該提督惟當益矢感奮。果能乘蔡逆窮蹙之時。設法擒獲捷音奏到。不特賞還花翎。仍當錫以世職之封。黃飛鵬係浙江總兵。協勦出力。致被礮彈擲傷腰骹。亦屬可嘉。著交部議敘。○十三年。以舟師撥勦蔡朱二逆夥黨。並續獲艇匪船礮。予遊擊陳夢熊參將戴花翎。

○十四年

諭。張師誠等奏殲除海洋積年首逆蔡牽。將逆船二百餘犯全數擊沈落海。並生擒助惡各夥黨。覽奏欣慰之至。王得祿邱良功協力奮追。殲除首惡。均屬可嘉。

而王得祿額角手腕各受重傷。仍復奮不顧身。趕攏賊船追剿。致該逆登時落海。厥功尤偉。王得祿著加恩晉封子爵。並賞給雙眼花翎。白玉翎管一箇。邱良功左骹受傷。本船被賊艘碰壞。不能前進。勞績稍遜。邱良功著加恩晉封男爵。至該逆用番銀作為礮子。可見鉛丸已屬罄盡。總由阿林保張師誠年來於各海口巡防嚴密。使一切火藥米石。概行杜絕。不得稍有透漏。該逆乃日益窮蹙。立行殲滅。辦理實屬認真。總督阿林保。巡撫張師誠。均著交部從優議敘。以示

嘉獎。○十八年

諭。那彥成奏官兵截勦輝縣竄匪。全數殄滅。殲斃逆首李文成及賊首劉幗明一摺。所辦可嘉之至。該將領及滿漢官兵等倍常奮勇。宜加優獎。色爾袁德甯阿著加恩各賞加都統銜。楊芳特依順保著加恩各賞加提督銜。即先換一品頂戴。該四員仍俱賞給雲騎尉世職。其本有世職者。准其再兼一雲騎尉。乾清門三等侍衛伊勒通阿。身受六傷。賈勇力戰。著加恩超升為乾清門頭等侍衛。仍給勁勇巴圖魯名號。再加賞四喜玉搬指一箇。花大荷包一對。小荷包兩箇。又發去玉柄小刀十把。砗磲翎管十箇。瓷搬指套十箇。

分賞出力官弁。一兩重銀鏤二百箇。五錢重銀鏤二百箇。一兩重銀牌一百面。五錢重銀牌一百面。分賞出力兵丁。○又

諭。那彥成等奏督率官兵攻克滑城一摺。覽奏欣慰。那彥成高杞楊遇春。統領師千。不辭艱瘁。其在事將領官兵等。亦俱奮勇出力。尤宜渥沛恩施。以昭懋獎。那彥成著加太子少保銜。賞給三等子爵。換戴雙眼花翎。在紫禁城內騎馬。並賞給御用荷包一箇。升授伊子容照為乾清門二等侍衛。所賞荷包翎枝。即著容照馳驛齎往。高杞著賞給頭等輕車都尉。紫禁城內

騎馬楊遇春著賞給二等男爵。紫禁城內騎馬桑吉
斯塔爾隨那彥成率先登城著加恩在御前侍衛上
行走。其摺內圈出各員。除那彥成高杞楊遇春外。凡
攻城出力者。俱著交部從優議敘。兵丁賞給一月錢
糧。圍城各官弁。俱著交部議敘。兵丁賞給半月錢糧。
並發去四喜玉搬指十箇。玉柄小刀十把。花瓷翎管
十箇。玻璃鼻煙壺五箇。瓷鼻煙壺五箇。分賞出力官
弁。一兩重銀鏤二百箇。五錢重銀鏤二百箇。一兩重
銀牌二百面。五錢重銀牌二百面。分賞出力兵丁。軍
機大臣等晝夜宣勞。董誥盧蔭溥著交部從優議敘。

桂芳著即在軍機大臣上行走。仍交部議敘。松筠曹振鏞。職任綸扉。俱著加恩。晉加太子太保銜。劉鐸之英和。督緝認真。俱著加恩。賞加太子少保銜。百齡同興。辦理防勦事宜。奮勉出力。俱著加恩。賞加太子少保銜。軍機章京通政使司參議姚祖同。著交部從優議敘。此外各章京。著軍機大臣查明尤為出力者。保奏數員。交部從優議敘。其餘各員。並著交部議敘。所有此次議敘各員。均照軍功例議給。